

Lita Nampa 2 Peterlu Walkatjunkunytja 2 Peter

Nyangatja Ngañmanytju Nyakula Wangkanytjaku

Nyangatja Godaku tjukurpa Peterlu walkatjunkunytja Jesuku walytja kutjupa tjutaku Jerusalemala patu nyinanytja tjutaku. Paluru lita kutjara walkatjuṛa palula tjanalakutu iyaṇu, ka lita nyangatja małatja paluru ilunytja kuwaripangka walkatjunkunytja. Munu lita nyanga palula paluru wangkara ngulutjunangi tjukurtjara ngunti tjutangka-tawara alatji wangkara, “Kuwari aŋangu kutjupa tjuta ngunti nintilpai tjuta nyuralanguru pakalku munuya tjukurpa kutjupa tjuta nyurala wangkara ngunti nintilku tjukurpa Godalanguru wiyatja tjana walytjangku kulintja. Munuya nyuranya ngunti kurara maunṭankuku nyura Godalawanu tjukaruru nyinanyangka.”

Munu Peterlu tjananya wangkara kunpunungi ngunti nintilpai tjuta kulira wantinytjaku munu tjukurpa mulapa kutju kulintjaku munu wirura palyanyku nyinanytjaku. Munu paluru tjanala wangkangi watarkuriwiyangku kulintjaku panya mulapa Jesunya ngula małaku pitjanyi palumpa walytja tjuta ngura wirukutu katinytjikitja palula tjunguringkula wanka titutjara nyinanytjaku.

Tjukurpa nyanganpa ngarinyi:

1:1-2 Peterlu ngañmanytju wangkanytja

1:3-21 Godalulanya ngurkantankunytja Christanya purunypa wirura palyanyku nyinanytjaku

2:1-22 Peterlu ngulutjunkunytja ngunti nintilpai tjutangka-tawara

3:1-18 Jesunya małaku pitjanytja tjukarurungku kulintjaku

Peterlu Nganmanytju Wangkanytja

¹ Uwa, Jesuku walytja tjuta, ngayuluña Simon Peternya Jesuku Christaku tjukurtjara, panya paluruṇi witura iyanu palumpa tjukurpa anangu tjutangka wangkanytjaku. Kaña lita nyangatja nyurampa walkatjunanyi, panya nyura nganaña purunypa alatjitu Jesuku Christaku pulkara mulamularingu wantintyta wiya. Panya paluru Godanya, nganampa panya wankaṟunkupainya munu panya tjukařuru alatjitu nyinanyi. Kala nyara palulanguru palula wangañarangku kulipai panya paluru tjukařurungku nganampa palyanu wiru mulapa.

² Uwa, nyura panya Godaku Mayatja Jesuku kuļu ngañmanypa nintiringu munu nyura kuwari palumpa walytjapiti nyinanyi. Ka Godalu nyuranya titutjarangku mukulyangku kanyinma munu nyuranya kurunpa rapara pukuļmanama.

Christanya Purunypa Wirura Nyinanytjaku

³ Nganaña ninti Godaku panya paluru witulya pułka alatjitu nyinanyi palya mulapa.

Panya paluru nganañanya ngurkantanu palunya arkara tjukaruru wiru mulapa nyinanytjaku. Munu paluru nganañanya kutjupa kutjupa uwankara ungu wiru tjuta, nganaña kunpuringkula Jesulawanu tjukaruru palyanyku nyinanytjaku. ⁴ Uwa, Godalu nganañanya wirungku kalkunu atunymara kanyintjikitjangku nganaña Jesunya purunypa wirura palyanyku nyinanytjaku kura uwankara wantira. Panya manta winkingkaya aŋangu kura tjuta nyinanyi panya tjana kuraku unngu mukuringkunytjatjanungku titutjarangku kura palyalpai. Palu Godalu nganañanya kunpuntjikitjangku kalkunu nganana kura uwankara wantira Godalawanu tjukaruru nyinanytjaku.

⁵ Uwa, nyura panya Godalawanu nyinanytjikitja mukuringkula ngañmanypa palumpa mulamularingu. Munu mulamularingkunytjatjanu nyura uti palya mulapa titutjara nyinama munuya Godaku nintiringama palumpa tjukurku kulu. ⁶ Munuya palumpa nintiringkula walytjangku kulira tjukaruru alatjiu nyinama kutjupangku ngunti wituwitunnyangka kulira wantira. Munuya tungun-tunguntu Godanya wañanma pakuringkunytja wiyangku, munuya palulawanu kutju titutjara palyanyku nyinama. ⁷ Munuya Jesuku walytja tjutaku pulkara pukularima munuya uwankaraku mukulya ngaltunytju nyinama.

⁸ Uwa, alatji nyura uti rawa nyinama Godalawanu wiru mulararinjtjikitja. Kaya kutjupa tjutangku nyuranya wirura tjukaruru nyi-

nanyangka nyakula kulilku, "Ai, mulapa nyanga paluru tjana Mayatja Jesuku ninti nyinanyi, panya paluru tjananya kunpuṇu warka wiru mulapa palumpa palyantjaku." Alatjiya nyuranya nyakula kulilku.

⁹ Palu tjinguru nyura kutjupatjara palu purunypa wirura nyinapai wiya, munuya wiru mulararintjikitjangku kulintja wiya. Kanā kulini nyura kuru pati purunypa watarku nyinanyi, panya nyuranya Godalu kura tjuṭa ngañmanytju palyantjitjanguru kalypangku wantingu nyura kura wantira warka wiru tjuṭa kutju palyantjaku. Palu nyura tjinguru ara nyanga palumpa watarkuringu munu panya anangu kuru pati purunypa nyinanyi kulintja wiyatja.

¹⁰ Uwa waltyja tjuṭa, mulapa panya Godalu nyuranya ngurkantanu palumpa waltyja mulapa nyinanytjaku, ka nyura uti palumpa waltyja alatjitu nyinama munu palunya wangañarangku kulilkatima wantintjatjuk. Panya alatji nyinara nyura punkantja wiya kunpu titutjara nyinaku. ¹¹ Ka nyara palulanguru Mayatja Jesusu Wankarunkupailu nyuranya ngula pukultu alatjitu katiku ngura wirukutu nyara palula nyuranya titutjarangku wirura kanyintjikitjangku.

¹² Tjukurpa nyanga palumpa panya nyura ninti nyinanyi ngañmanytju kulintjatjanu, munu panya nyura rawangku kulilkatinyi. Palu palya, rawangkuṇa nyurala wangkanyi nyura watarkurintjaku-tawara. ¹³⁻¹⁴ Panya ngayulu ankunytjaku tjintu waṭalpi ilaringanyi, panya Mayatja Jesuluṇi ngañmanytju tjakultjunu.

Kaṇa palulanguru tjukurpa nyangatja wanka nyinaralpi nyurala wangkanyi nyura rawangku kulilkatinytjaku. ¹⁵ Mununa palulanguru nyiri tjutangka kuļu tjukurpa walkatjunanyi ngayulu ilunyangka nyura nyakula kulintjaku watarkurinytja wiyangku.

Jesunya Witulya Pulka Nyakunytja

16-18 Uwa, panya tjakultjunuṇa nyurala ngaṇmanytju Mayatja Jesunya Christanya małaku pitjanytja witulya pitalytji pulka mulapa. Panya nganaṇa walytjangku pinangku kulira wangkanytja wiya, palu nganana maṇkurtu kuṛungku nyangu Jesunya puļi katu ngaranyangka Mosela pulala Ilaitjala tjungu. Munula ngarala nyangangi Mama Godalu Jesunya pitalytji pulkangku irnyara kanyinnyangka munula kulinu Godalu ilkaringuṛu wangkanyangka nyanga alatji, “Nyangatja ngayuku katja, kaṇa palumpa pulkara pukularinyi.” ¹⁹ Panya iritiya Godaku wangkatjara tjutangku tjakultjunangi wati wiru mulapa mała pitjanytjaku. Kala kuwari Jesunya nyakunytjatjanu tjukurpa panya tjana wangkanytjajaku pulkara mulamularinganyi.

Ka nyura kuļu uti tjukurpa palunya tjananya pulkara kulinma, panya wangkatjara tjutangkuya tjukurpa tilitjara tjakultjunangi. Panya tilingku mungawalurungka irnyara utilpai, palu purunypa panya tjukurpa paluru nyurala utiringu, ka nyura utilta kulini. Ka tjukurpa paluru titutjarangku utini ngula Jesunya małaku pitjanytjakutu-wangkara. Ka

paluru pitjanytja nyaa purunypa, panya kililpi Katanya tjintukutu pakalpai kala nyakula kulilpai, “Kuwari tjinturinganyi.” Nyara palu purunypa Jesunya malaku wirkankunyangka nyakula nganana kulilku, “Panya paluru wirkanu.” Kaya nyara palumpa pitjanytjaku paṭara tjukurpa nyanga palunya rawangku kulilkatima.

²⁰⁻²¹ Palu nyangatjaya kulinma, panya wangkatjara tjutangku iriti tjana mukuringkula walytjangku kulintjitja nyiringka tjunkunytja wiyaṭu. Palu Kurunpa Milmiltu tjanala unngu nintinnyangka kutju tjana wangkangi munu walkatjunangi. Ka nyuntu nganana uwankara kuļu palu purunypa nyinanyi, panya Kurunpa Milmiltu ngananañanya nintinnyangka kutju nganana Godalu wangkanytja uwankara tjukarurungku kulilpai.

2

Ngunti Nintilpai Tjuṭa

¹ Palu panya wangkatjara ngunti tjutaya iriti nyinangi Godaku anangu tjutangka tjungu. Nyara paluru tjana Godalu wituntja wiyatja. Ka palu purunypatu kuwari anangu kutjupa tjuta ngunti nintilpai tjuta nyuralanguru pakalku munuya tjukurpa kutjupa tjuta nyurala wangkara ngunti nintilku tjukurpa Godalanguru wiyatja tjana walytjangku kulintja. Munuya nyuranya ngunti kurara maunṭankuku nyura Godalawanu tjukaruru nyinanyangka. Panya Mayatja Jesunya tjanampa ngalkilpa anga-ilungu paluru tjana kura

nyinanyangka munu tjananya wankarunu palumpa walytjaringkunytjaku. Palu paluru tjana Jesunya mayatja wianmankunyangkampa ngula tjintu małatjangka Godalu tjananya pika pułka mulapalta ungkuku.

² Palu Jesuku walytja kutjupa tjuṭaya tjinguru palumpa tjanampa tjukurku mulamularingkuku munuya palula tjanala tjunguringkula kuraringkuku munuya kuri kutjupa kutjupaku mukuringkula ngunti-ngunti al̄tiku. Kaya nyara palulanguru an̄angu tjuṭangku tjananya nyakula Godanya anara kuralku wangkara, “Godaku tjukurpa tjukaruru wiya.” ³ Panya ngunti wangkapai nyara paluru tjana maniku manyu munuya nyurala ngunti wirura wangkapai palyangku-palku nyura palunya tjananya mani ungkunytjaku. Palu panya iritinguru alatjitu Godalu tjananya nyangangi munu kuliningi ngula palunya tjananya pika pułka mulapa ungkunytjikitjangku.

⁴ Panya iriti angelpa kutjupa tjuṭangku Godala pułkarə tungunpungu munu kuraringu. Ka Godalu tjananya ngura kurakutu wañingu mungawalurungka rawa nyinanytjaku tjiinangka karpiṛa wantinytja puruny pa. Kaya ngura nyara palula rawa paṭara nyinaku ngula tjintu małatjangka Godalu tjananya kura ngurkantara tjarantjaku munu tjananya pika pułka mulapa ungkunytjaku.

⁵ Ka aṛa kutjupa palu puruny pa ngarangi, panya Noah-nya nyinanytja-arangka an̄angu tjuṭangku Godala pułkarə tungunpungkula kura kutju palyaningi. Ka wati kutjungku Noah-lu

arkaṛa tjananya wangkara puṭu tjukaruruningi Godalawanu tjana tjukaruru nyinanytjaku. Palu tjana Noah-nya kulintja wiyangku alatjiṭu wantingi. Nyara palulanguru Godalu tjananya uwankara ngalturingkuwiyangku mina pulkangka iluntara wiyanu, palu Noah-nya munu palumpa walytja tjuṭa kutju wankarunu anangu panya 8 kutju.

⁶ Kaya piruku kulinma ara kutjupa ngura panya pulka kutjara ini panya Tjatamanya pulanya Kumaranya. Panya iriti tawunu nyara palula pulala anangu winki kura pulkaringu munuya kura kutju tiṭutjarangku palyaningi rawangku. Ka nyara palulanguru Godalu panya waru pulka tjanalakutu iyanu ilkaringga. Ka tawunu panya palunya pulanya kampara wiyanu alatjiṭu anangu winki. Nyanga alatji Godalu palyanu anangu ngura winkitjangku kuliṛa nintiringkula kulintjaku, “Munta mulapa Godalu nganaṇanya ngapartji palula tungunpungkunyangka palu puṛunypaṭu palyalku.”

^{7.8} Munu nyura uti wati panya Lotanya kulu kulinma, panya wati nyara paluru ngura nyara palulatu nyinangi, Tjatamala. Palu nyara paluru wati palya Godalawanu tjukaruru nyinapai munu panya tjananya kura kutjupa kutjupa tjuṭa palyannyangka nyakula pulkara tjituru-tjitururingu, panya anangu nyara paluru tjana Godala pulkara alatjiṭu tungunpungangi. Ka panya Godalu ngura Tjatamanya pulanya Kumaranya waru pulka ilkaringga iyara uwankara alatjiṭu wiyanu, palu waru iyantja kuwaripangka

paluru Lotanya-wararangku pakaltjingara
iyañu ankula wankaringkunytkaku.*

⁹ Uwa, tjukurpa nyanga palunya tjananyaya kulinma munuya nyanga tjanalanguru nintiringama nyanga alatji, panya mulapa Godalu añañgu tjukaruru nyinapai tjuña kutju wankañunkupai kura kutjupa kutjupa tjuña tjanala utiringkunyangka. Munu paluru kura palyalpai tjuña wantir'iyalpai pika pulkatjara titutjara nyinakatinytjaku tjirirpi malatjakutuwangkara, panya nyara palula aña paluru tjananya ngurkantara tjaralku munu tjananya pika pulka mulapalta ungguku. ¹⁰ Panya kutjupa tjaraya Godala pulkaña tungunpungkupai nyinanyi munuya tjana mukuringkunyta kutju palyalpai kura kutjupa kutjupa tjuña kutju, munuya kuri waltytjatjarangka ngaripai, ngunti wangkapai munuya kañany-kañanytju ilkaritja tjuña anaña warkipai kunteringkunyta wiyangku.

Palu mulapa Godalu tjananya watarkurinyta wiyangku nyanganyi ngula tjirirpi malatjangka ngurkantara tjarantjikitjangku munu tjananya uwankara wiyanjtaku. ¹¹ Panya angelpa tjuñaya witulya pulka mulapa nyinanyi ngunti nintilpai tjuñangka muñkara alatjiñu munuya tjinnguru tjananya uwankara anaña warkinyangka wantir'iyalku. Palu wiya, tjana alatji palyalwiyangku wantipai, panya nyara paluru tjanaya Godala miñangka ngaranyi munuya paluru tjana ngurkantara tjaralpai wiya. ¹² Panya ngunti

* ^{2:7-8} Genesis 19:1-29

wangkapai tjutangkuya putu kulilpai munuya kutjupa kutjupa tjuta watarkungku alatjitu palyalpai tjukarurungku-palku. Munuya kutjupangku tjukurpa wiru wangkanyangka putu kulira analpai alatjitu. Paluru tjana kuka tjuta purunypa nyinanyi, panya kuka tjuta watarku para-ngarapai pungkula ngalkuntjaku kutju. Palu purunypatu anangu ngunti wangkapai tjuta para-ngarapai, ka kuka purunypa tjananya pungkula wiyalku. ¹³ Panya tjana kura kutju palyalkatinyi, ka Godalu ngapartji tjananya paira iyalku ngura kurakutu pika pulkatjara titutjara nyinanytjaku.

Panya anangu nyara paluru tjana pulkara pukularintjikitjangku tjana mukuringkunytjitja kutju rawangku palyalpai munuya kalala alatjitu anangu tjutangka mirangka mai pulka tjunguringkula ngalkula tjikira tarangkarira mirapai kunta wiya alatjitu. Tjana nyurala maiku palya-palku tjunguringkula pulkara ngalkula tjikilpai ka panya nyura tjananya nyakula pulkara kuntaringkupai tjana kura tjuta rawangku palyannyangka. ¹⁴ Munuya kungka kutjupa tjuta titutjarangku nyakula mukuringkupai tjana la ngarintjikitja munuya pakuringkula wantintjija wiyangku titutjarangku kura kutju palyalpai. Munuya Jesuku waltyta kutjupa tjuta kunpu wiya ngaranyangka tjananya wituwitulpai piruku kura palyantjaku munu Godalanguru paturingkunytjaku. Panya tjana mukuringkula palyalpai tjana mukuringkunytjitja tjuta kutju. Ka nyanga palulanguru Godalu tjananya

pungkuku. ¹⁵ Panya tjana Godaku iwara tjukaŋuru wantira kawankatingu munuya Pailamaku arangka ngaranyi. (Wati nyara paluru panya Piiyaku katja.) Panya nyara paluru manikitjangku pukultu kura palyaŋu. ¹⁶ Watи nyanga paluru panya Godaku wangkatjara nyinangi, palu palumpa tangkiyingku palula wangkangu munu palunya painu kura panya palunya palyalwiyangku wantintjaku.

¹⁷ Uwa, panya wangkatjara ngunti wangkapai tjutaya kapi tjukula pilti purunypa ngaranyi, panya anangu tjuta pitjapai tjanala tjukurpa kulintjikitja, palu puŋuya tjukurpa mantjilpai tjanalanguру. Munuya paluru tjana ngangkali kapi wiyatjara purunypa ngaranyi, panya walpa pułkangku unṭulpai ka mapalku wiyaringkupai, nyara palu purunypa tjana nyinanyi tjukurpa wiruŋa wangkanytja wiya. Ka Godalu tjananya kalkunu mungawalurungka alatjtju tjana titutjara nyinanytjaku maru mulata.

¹⁸ Panya tjana kaŋany-kaŋanytju kurakura tjuta titutjarangku wangkapai. Munuya anangu kuwari kutju Jesuku waltytjaringkunytja tjuta wangkara mukumukulpai paluru tjana piřuku kura panya palunya tjananyatu palyantjaku, panya tjana ngaŋmanytju Jesuku waltytja wiyangku palyaningi, panya palunya tjananya palyantjaku tjananya piřuku wituwitulpai. ¹⁹ Munuya tjanala alatji wangkapai, ngunti panya wangkapai tjutangku, “Palya, nyura mukuringkulaya palyanma, nyura mukuringkunytjitja tjuta kutju.” Alatji tjana wangkapai, palu paluru tjana puṭu palyanyku nyinapai munuya tjana kura

tjuṭa kutju palyalpai tjana kuraku mukuringkunytjitja kutju. Panya kutjupa tjuṭa tjailangka unngu nyinapai kura palyantjatjanu munuya puṭu pakanī tjailanguru, palu purunypa aŋangu kura palyalpai tjuṭa puṭu kuranguru pakalku.

20 Panya ngañmanypa tjana Godaku wangkatjara nyinangi Jesuku waltyja munuya kura tjuṭa wantingu alatjiṭu Godalanguru paṭuringkunytjaku-tawara. Panya tjana nintiringu Mayatja Jesuku Christaku nganampa panya Wankarunkupaiku. Palu palula malangkaya piṛuku kuraringkula kurangka anu, ka kurangku tjananya tjiinangka purunypa karpiṛa kanyini. Ka nganalu tjananya wankalku? Wiya alatjiṭu. **21** Panya tjana Tjukurpa Palyaku nintiringkunytjatjanu kurakutu małaku anu, ka tjanampa wankaringkunytjaku wiyaringu alatjiṭu. Aŋangu watarkitja tjuṭa iwara palyaku ngurpa nyinanyi, ka ala alatjiṭu ngaranyi paluru tjana kulira mulamularingkunytjaku munu wankaringkunytjaku. Palu nyanga paluru tjana ngurpa wiya ninti nyinanyi ngañmanypa Jesuku waltyjaringkula, munu panyaya iwara palya wantira Godaku tjukurpa miłmilpa kulira wantingu alatjiṭu, munuya kurakutu małaku anu. **22** Panya nyiringka ngaranyi tjukurpa palu purunypa aŋangu tjuṭangku wangkanytja nyanga alatji,

“Papangku ulkapatjunkula wantikatipai munu piṛuku małakungku pitjala ulkapa panya

palunyaṭu ngalkupai.” *

Ka palu purunypa tjukurpa kutjupa alatji ngaranyi,

“Panya pikipiki paltjinnyangka wirtjapakara tjulpirta malaku tjarpara kuṭinkatira piruku kuraringkupai.”

Ka ngunti wangkapai tjuṭa nyanga palu purunypa ngaranyi, panya tjana Jesuku walytjaringkula iwara palyangka anangi, palu paluru tjana iwara palya wantira malaku kurakutu anu, panya papa munu pikipiki purunypa.

3

Jesunya Małaku Pitjanytja

¹ Uwa walytja wiru tjuṭa, ngayulu pulkara mukuringanyi nyura tjukarurungku kutju kulintjaku pina alangku. Panya ngayulu alatji nyuranya wangkara wituwituṇu lita panya ngañmanyitjangka, panya ngayulu mungatu nyurampa walkatjura ma-iyantu, panya palula. Munu nyangaña kuwari pirukuṭu nyurampa walkatjunanyi nyura rawangku tjukarurungku kutju kulintjaku. ² Panyatjaya rawangku kulinma, panya Godaku wangkatjara tjuṭangku iriti wangkangu ngula utiringkunytjaku, munuya piruku kulinma tjukurpa panya Mayatja Jesulu palumpa iyantja tjuṭangka wangkanytja, panya paluru tjana nyurala ngañmanytju tjakultjunu.

* 2:22 Proverbs 26:11

³ Munuya panyatja rawangkutu kulinma, panya Jesunya małaku pitjanytjaku ilaringkunyangka aŋangu analpai tjuta utiringkuku munuya tjana walytjangku kulira kutjupa kutjupa kura tjuta palyalku tjananku mukuringkunytjtja kutju. Munuya paluru tjana nyuranya Jesuku mulamularingkunyangka wiyanmara wangkaku alatji, ⁴ “Mulapa wanyu Jesulu kalkunu malaku pitjanytjikitjangku? Ka nyangatja wiyatu ngaranyi. Panya mamanya ngunytjunya tjana putu paṭara paṭara ilungu. Ka nyanga manta ilkari kulu palurutu alatjtu ngaranyi wiyaringkunytja wiya, panya Godalu nganmanytju palyara wantintytja alatjtu.”

⁵ Alatji tjana nyuranya anara wangkaku, palu paluru tjana kura ngunti wangkapai tjuta. Panya aŋangu nyanga palu purunypa tjutangkuya tjukurpa panya Godalu paluntjtja kulira wantingu mulamularingkunytja wiyangku. Panya Godalu wangkanyangka ilkari utiringu munu paluru wangkanyangkatu manta utiringu uru kutju ngarintjtjanu.

Uwa, paluru manta utiringkunytjaku wangkangu, ka panya urunguru pakanu.

⁶ Ka panya ngulalta Godalu mina pulka iyara mantatja uwankara uru pułkangka iluntanu aŋangu nganmanyitja tjuta kulukulu. ⁷ Palu kuwari wanyu Godalu manta ilkari kutjupa kutjupa uwankara nyaalku? Wiya, paluru tjananya paṭara kanyini tjintu małatjaku panya nyara palula arangka paluru tjananya uwankara palu purunypatu wangkaku, ka wangkanyangka warungku kampara wiyalku alatjtu. Munu

paluru anangu kura uwankara ngurkantara tjaralku munu tjananya wiyalku.

8 Uwa waltyja tjuta, kulinmaya nyangatja watarkuriwiyangku, panya Mayatja Jesulu kampa kutjupa kulilpai nganaña purunytpu wiya. Panya nganaña kulilpai kuli 1,000 rawa mulapa ngaranyangka, palu Mayatja Jesulu kulini nyara paluru rawa wiya tjintu kutju purunypa. Kala nganaña kulilpai tjintu kutju rawa wiya, palu Mayatja Jesulu kulini tjintu paluru rawa mulapa kuli 1,000 purunypa. Alatji paluru witulya pulkangku kulilpai.

9 Tjinguru nyura kulini Jesunya rawa maninanyangka-palku, munu nyura palulanguru kulini paluru ngunti kalkuntja-palku pitjanytja wiya ngaranyangka nyakula. Palu wiya, paluru anangu uwankaraku ngaltunytpungku rawangku pañani tjana uwankarangku kura wantira Godalakutu aruringkunytjaku. Palu wiyangkampa tjintu malatjangka paluru tjananya ngurkantara tjaralku munu tjananya wiyalku, panya paluru ngaltunytpu pulka tjanampa mukuringanyi kura wantira palunya kulira wañantjaku. Palulanguru paluru rawaringkula ma-nyinara pañani mapalku pitjanytja wiya.

10 Panya ngula Mayatja Jesunya urulyku wirkankuku, panya wati kutitjunkupai walingka tjarpanyangka nyuntu urulyaralpai, palu purunypa. Ka tjintu nyara palula ilkari wiyaringkuku rurku winki. Panya tjintu, pira, kililpi, manta winki uwankara wañungku kampara ursulku ka wiyaringkuku alatjitu.

11-12 Uwa, uwankara alatjitu warungku kampara wiyalku manta kulukulu, ka pala palulanguru nyura uti Mayatja Jesunya malaku pitjanytjaku patara tjukaruru nyinama Mama Godalawanu kutju, ka paluru tjinguru mapalku pitjaku. Ka tjintu nyara palula Godalu uwankara waru pulkangka wiyalku, ka tjintu pira kililpi tjuta kulukulu uwankara waruringkula ururingkula wiyaringkuku. **13** Palu palya, panya Godalu kalkunu manta kuwaritja munu ilkari kuwaritja kulu nganampa palyantjikitjangku, kala palumpa ala-ala patara nyinanyi. Panya ngura nyara palula anangu uwankarangku Godala wanganarangku kuliku munu tjukaruru nyinaku tiutjutjara.

14 Uwa walytja tjuta, nyura tjintu nyara palumpa ala-ala patarampa tjukaruru palyanyku nyinama kura kutjupa kutjupa uwankara wantira. Ka nyuranya Jesulu pitjala nyakuku Godalawanu kutju wirura kurunpa rapa pukulpa nyinanyangka.

15 Munuya panyatja kulinmatu, panya Mayatja Jesunya rawaringkula kuwaripatu nyinanyi anangu tjuta palumpa mulamularingkula wankaringkunytjaku patara. Tjukurpa nyangatja panya nganampa kuta panya wirungku Paulalu ngamanytju nyurampa walkatjunu Godalu nintinnyangka. **16** Panya paluru lita tjuta walkatjura iyaningi Jesuku walytja tjutakutu, munu lita panya palula tjanala uwankarangkatu tjukurpa palunyatu walkatjunangi. Ka tjukurpa kutjupa tjuta lita tjutangka wituwitu nguwanpa ngaranyi. Ka

panya Jesuku walytja kutjupa tjuṭa kuṇpu wiya ngurpa ngaranyi, munuya tjukurpa wituwitu panya palunya tjananya puṭu kulira ngunti kampa kutjupara wangkapai, panya palu purunypa, panya tjana Moseku tjukurpa kulu ngunti kampa kutjupara wangkapai, palu purunypa. Nyara palulanguru panya Godalu tjananya tjintu malatjangka paṛa iyalku pika pulkatjara titutjara nyinanytjaku.

¹⁷ Palu walytja tjuṭa, nyura panya nyangaku ngañmanypa nintiringu. Palulanguruyanku ngulu nyangama munuyanku atunyamanama anangu kura tjutangku nyuranya ngunti kurara iwara kurangka katintytjaku-tawara. Panya paluru tjana Godaku tjukurta tungunpungkula iwara kurangka ananyi munuya tjukurpa ngunti tjuṭa kulira wangkapai. Ka nyura tjanala kulira wantima Godalanguru paturingkunytjaku-tawara. Panya Godalu nyuranya wankaru kanyini nyura palula tjungu nyinanyangka.

¹⁸ Uwa, titutjarangkuya Mayatja Jesunya Christanya wañanma, panya paluru nganampa wankarunkupainya nyinanyi ngaltunytju pulkanya. Munuya titutjara palumpa nintiringama.

Uwa, wanyula palunya titutjarangku mirewañira walkunma wantintytja wiyangku. Uwa mulapa.

Alatjituna walkatjunu. Palya.

**Tjukurpa Palya
Portions of the Holy Bible in the Pitjantjatjara
language of Australia**

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 11 Nov 2022 from source files dated 22 Nov 2019

b29b7786-0954-5b75-82cb-3657182b63d6